

Argraffnodau ar gyfer pleidiau gwleidyddol – Cymru, Lloegr a Gogledd Iwerddon

O dan Ddeddf Pleidiau Gwleidyddol, Etholiadau a Refferenda 2000, ceir rheolau am roi argraffnodau ar ddeunyddiau etholiadol print. Ni sy'n rheoleiddio cydymffurfiaeth â'r rheolau hynny.

Deunydd etholiadol yw deunydd cyhoeddedig y gellir ystyried yn rhesymol taw ei fwriad yw dylanwadu ar bleidleiswyr i bleidleisio dros neu yn erbyn un neu ragor o bleidiau gwleidyddol neu gategori o ymgeiswyr mewn etholiadau penodol.

Pan gaiff deunydd etholiadol ei argraffu, rhaid iddo gynnwys rhai manylion penodol (y cyfeirir atynt fel 'argraffnodau') er mwyn

dangos pwy sy'n gyfrifol am y deunydd. Mae hyn yn helpu i sicrhau tryloywder ynglŷn â phwy sy'n ymgyrchu.

Mae'r rheolau ar argraffnodau yn gymwys i bob plaid wleidyddol. Maent yn gymwys pryd bynnag y byddwch yn cynhyrchu deunydd argraffedig sy'n hyrwyddo eich plaid. Mae'r daflen ffeithiau hon yn esbonio'r rheolau y mae rhaid i chi eu dilyn.

Cymhwysir rheolau argraffnodau gwahanol at bleidiau gwleidyddol sy'n ymgyrchu yn etholiadau Senedd yr Alban ac yn etholiadau cyngor yr Alban. Gweler [Argraffnodau ar gyfer pleidiau gwleidyddol - Etholiadau Senedd yr](#)

Alban ac etholiadau cyngor yn yr Alban am ragor o fanylion.

Mae'r daflen ffeithiau hon yn esbonio'r rheolau y mae'n rhaid i chi eu dilyn wrth ymgyrchu mewn unrhyw etholiad arall.

Beth yw deunydd etholiadol?

Deunydd sy'n cael ei gyhoeddi yw deunydd etholiadol, megis taflenni a hysbysebion sy'n hyrwyddo'r blaid, ei hymgeiswyr neu ei pholisïau, neu'n beirniadu pleidiau eraill mewn etholiadau.

Beth dylech chi ei gynnwys?

Ar ddeunydd etholiadol argraffedig megis taflenni a phosteri, mae'n rhaid i chi gynnwys enw a chyfeiriad y canlynol:

- yr argraffydd
- yr hyrwyddwr,
- unrhyw berson y cyhoeddir y deunydd ar ei ran (ond nid yr hyrwyddwr)

Rhaid i chi ddefnyddio cyfeiriad lle y gellir cysylltu â chi. Gallwch ddefnyddio cyfeiriad cartref, cyfeiriad swyddfa, neu gyfeiriad busnes. Gallwch hefyd ddefnyddio blwch SP neu wasanaeth blwch post arall.

Os byddwch yn rhoi hysbyseb mewn papur newydd, nid oes angen i chi gynnwys enw a chyfeiriad yr argraffydd ond rhaid i enw a

chyfeiriad argraffydd y papur newydd ymddangos ar dudalen gyntaf neu dudalen olaf y papur newydd. Rhaid i'r hysbyseb gynnwys y manylion eraill, fel arfer.

Os byddwch yn cael eich talu i gyhoeddi deunydd etholiadol, rhaid i'r deunydd gynnwys argraffnod sy'n cynnwys manylion pwy bynnag sy'n eich talu. Mae hyn gan taw naill ai nhw yw'r hyrwyddwr, neu rydych chi'n cyhoeddi'r deunydd ar eu rhan.

Ym mhob achos, rhaid i chi sicrhau bod yr argraffnod yn rhestru'r holl sefydliadau sydd ynghlwm wrth gyhoeddi a hyrwyddo'r deunydd.

Mae'n drosedd i argraffydd neu hyrwyddwr gyhoeddi deunydd etholiadol print heb argraffnod.

Enghraifft o argraffnod

Gall yr hyrwyddwr fod yn Drysorydd y blaid, swyddog arall yn y blaid, neu'r blaid ei hunan.

Dylai argraffnod safonol ar ddeunydd etholiadol plaid ymddagnos fel hyn:

Argraffwyd gan Armadillo Printing Ltd, 22 Thornfields Avenue, Glasgow. Hyrwyddwyd gan y Blaid Felyn, 110 High Street, Airdrie.

Lle rydych yn gosod yr argraffnod?

Os yw'r deunydd yn ddogfen argraffedig un ochr - megis poster ffenestr - neu lle mae'r rhan fwyaf o'r wybodaeth ar un ochr, mae'n rhaid i chi roi'r argraffnod ar ochr honno'r ddogfen.

Os yw'r ddogfen yn un gyhoeddedig aml-ochrog, mae'n rhaid i chi ei roi ar y dudalen gyntaf neu'r dudalen olaf.

Gwefannau a deunydd electronig arall

Fel mater o arfer da, rydym yn argymhell eich bod yn gosod argraffnod ar ddeunydd electronig, megis gwefannau a negeseuon ar y cyfryngau cymdeithasol. Dylai'r argraffnod gynnwys enw a chyfeiriad yr hyrwyddwr ac unrhyw sefydliad neu unigolyn y cynhyrchwyd yr argraffnod ar eu rhan.

Lle y bo'n anymarferol cynnwys argraffnod llawn ar ddeunydd etholiadol dylech ystyried sut y gellid darparu ffordd amgen o gysylltu'r deunydd â chi

Cyfryngau cymdeithasol

Argymhellwn eich bod yn cynnwys yr argraffnod ar y neges ei hunan. Gallwch hefyd ei gynnwys rywle gerllaw sydd wedi ei nodi yn glir.

Er enghraifft, ar Twitter, gellir cynnwys eich argraffnod mewn man amlwg ar eich proffil. Ar gyfer hysbysebion y talwyd amdanynt ar Facebook, gallwch gynnwys yr argraffnod yn nhestun yr ymwadiad sy'n mynd gyda'r hysbyseb.

Cyllido torfol

Os ydych yn defnyddio gwefan cyllido torfol, dylech sicrhau bod y wefan yn nodi'r glir i bwy y rhoddir yr arian. Rydym yn argymhell eich bod yn rhoi argraffnod ar y we-dudalen. Gallwch gael rhagor o wybodaeth ar ein [taflen ffeithiau cyllido torfol](#).

Lle y bo'n anymarferol cynnwys argraffnod llawn ar ddeunydd etholiadol dylech ystyried sut y gellid darparu ffordd amgen o gysylltu'r deunydd â chi.

Delweddau a chartwnau

Argymhellwn eich bod yn cynnwys yr argraffnod ar y llun ei hunan.

Os caiff ei gyhoeddi ar y cyfryngau cymdeithasol, gallwch gynnwys argraffnod yn yr un modd ag y byddwch ar unrhyw neges arall ar y cyfryngau cymdeithasol.

Os nad yw'n ymarferol rhoi argraffnod llawn ar ddelwedd, dylech gynnwys testun cyswllt, neu logo neu emblem ar ffurf hyperddolen sy'n arwain at eich argraffnod llawn.

Fideos

Argymhellwn eich bod yn cynnwys yr argraffnod yn y fideo ei hunan. Dylai'r argraffnod fod yn ddarllenadwy, a dylai ymddangos yn ddigon hir i bleidleiswyr allu ei ddarllen.

Os caiff y fideo ei chyhoeddi ar y cyfryngau cymdeithasol, gallwch gynnwys argraffnod yn yr un modd ag y byddwch ar unrhyw neges arall ar y cyfryngau cymdeithasol.

Poster i'w lawrlwytho

Dylai unrhyw bosteri sydd ar gael i'w lawrlwytho oddi ar wefan ddwyn yr argraffnod llawn. Os caiff y posteri eu hargraffu a'u harddangos fel deunydd argraffedig, rhaid iddynt ddwyn yr argraffnod llawn gan gynnwys manylion yr argraffydd. Os ydych yn bwriadu gwneud hyn, dylech adael gwagle er mwyn iddynt gynnwys eu manylion fel yr argraffydd.

Fforymau trafod ar-lein

Fel arfer da, rydym yn awgrymu, os ydych yn defnyddio fforymau trafod ar-lein, y dylech amlygu'r ffaith eich bod yn ymgeisydd lle y bo'n bosibl.

Ble y gallwch gael rhagor o wybodaeth

Yn ogystal â'r rheolau ar argraffnodau, ceir hefyd reolau ar godi arian a gwariant y mae'n rhaid i bleidiau gwleidyddol eu dilyn yn y cyfnod cyn etholiadau. Rydym yn cyhoeddi cyfres o ganllawiau i bleidiau gwleidyddol sy'n esbonio'r rheolau hyn, y gallwch eu gweld ar ein [gwefan](#).

Rydym hefyd yn cynnig gwasanaeth cynghori, a gallwch gysylltu â ni ar un o'r rhifau ffôn neu gyfeiriadau e-bost isod.

- Cymru
gwybodaeth@comisiwnetholiadol.org.uk
0333 103 1929
- Lloegr
pef@electoralcommission.org.uk
0333 103 1928
- Gogledd Iwerddon
infonorthenireland@electoralcommission.org.uk
0333 103 1928

Cyfieithiadau a fformatau eraill

Am wybodaeth ynghylch cael y cyhoeddiad hwn mewn iaith arall, mewn fersiwn brint bras, neu Braille, cysylltwch â'r Comisiwn Etholiadol:

- publications@electoralcommission.org.uk
020 7271 0500